

Konstitusen blong Disability Promotion & Advocacy (DPA) Asosiesen

1. NEM

Nem blong oganaesesen ia hem i Disability Promotion & Advocacy Asosiesen. (Stat long ples ia oli singaotem "DPA" o "Komiti" nomo.) DPA oli rejistarem hem finis adanit long Charitable Organisations Act.

2. OFIS WE OLI REJISTAREM

Adres blong DPA we oli rejistarem hem i PO Box 1378 Port Vila, Vanuatu. Hedkwota blong DPA i stap long Port Vila.

3. OL STAMBA TINGTING BLONG DPA

Ol stamba tingting blong DPA i olsem:

- a) Talemaot ol tingting long saed blong ol raet blong ol disebol pipol long Vanuatu, mo leftemap save abaot ol samting we ol disebol pipol oli save mekem;
- b) Askem strong long Gavman se hem i mas setemap wan nasonal komiti blong mekem ol wok long saed blong disebol pipol i kam wanples. Komiti ia i mas gat inaf sapot blong mekem gud wok blong hem. Long komiti ia, i mas gat representativ we i kam long Gavman, ol NGO, ol disebol pipol, mo ol grup we oli wok wetem ol disebol pipol.
- c) Mekem sua se gavman mo ol nara oganaesesen i implimentem "Mandate for Action" we ESCAP i raetem long taem blong Asia-Pacific Decade of Persons with Disability
- d) Soemaot klia long ol disebol pipol long Vanuatu se ol raet blong we oli gat oli semak raet we yumi evriwan i gat.
- e) Givhan long ol disebol pipol, ol man we oli helpem ol disebol pipol, ol famle blong olgeta, ol komiuniti, ol NGO wetem ol dipatmen blong gavman blong luksave ol stamba tingting ia.
- f) Setemap ol bransis long evri provins blong promotem ol stamba tingting ia.
- g) Trenem ol disebol pipol blong halpem olgeta oli tekpat fulwan long evri level blong sosaeti.

4. OL MEMBA

- a) Eni man o woman we i sapotem ol stamba tingting blong DPA i save kam memba blong DPA taem hem i pem fi blong joen.
- b) Ol memba we oli pem fi blong joen olgeta nomo oli save vot long eni Miting blong DPA.

- c) Ol memba we oli pem fi blong joen olgeta nomo oli save stanap long eleksen long Eksekutiv Komiti (Coordinating Committee) o save representem DPA long eni miting long Vanuatu o long nara kaontri.
- d) Ol Frens blong DPA is save kam olsem ol asosiet memba be oli ino save vot long eni miting.

5. OL FI BLONG KAM MEMBA

Jenerol Miting blong DPA we oli holem evri yia (we oli singaotem "AGM") i save talemaot fi blong kam memba mo eni narakaen fi.

6. MAN I NOMO MEMBA

- a) Man we hem i memba i save tekemaot membasip blong hem eni taem hem i wantem, be hem i mas talem Jeaman blong DPA fastaem.
- b) DPA i save sakemaot wan memba sapos hem i mekem wan samting we hem i agensem ol stamba tingting blong DPA, sapos i pasem wan vot we bitim tu long evri tri memba i vot long hem. Long saed ia, oli mas talem long memba ia bifo long miting, mo memba ia i mas gat janis blong ansarem toktok ia. Mo tu, sapos oli sakemaot hem, hem i save apil i go long AGM

7. JENEROL MITING WE OLI HOLEM EVRI YIA (AGM)

AGM hem i kontrolem ol aktiviti blong DPA.

- a) Ol man we oli save kam long AGM hem i ol representativ blong ol bransis long ol provins, ol memba we oli bin pem fi, mo ol memba blong Eksekutiv Komiti.
- b) DPA i mas holem AGM bifo long 30 Maj long evri yia.
- c) Notis blong miting ia i mas go long ol memba tu wik bifo de blong miting.
- d) Long agenda blong AGM i mas gat:
 - i) Minit blong AGM blong yia we i pas.
 - ii) Ol samting we i kamaot long minit.
 - iii) Ripot blong Jeaman.
 - iv) Ripot blong Kodineta.
 - v) Ripot long yia we i pas (Annual Report).
 - vi) Ripot long saed blong mane (we oli oditim finis).
 - vii) Eleksen blong Eksekutiv Komiti (evri tu yia).
 - viii) Apoenmen blong Odita (evri tu yia).
 - ix) Eni nara samting.
- e) I mas gat 20 memba evriwan i stap long miting bifo AGM i save gohed.
- f) Sapos i nogat 20 memba i stap, Jeaman bae i makem wan nara de blong AGM we oli mas holem miting bifo 5 de blong wok i pas.

- g) Long seken miting ia, rul (7j) i nomo aplae, mo miting i save gohed, be i mas mekem ripot long nekis AGM.
- h) Ol memba blong pablik i save kam long AGM.

8. OL NARA JENEROL MITING

- a) Jeaman i save singaotem ol nara jenerol miting blong tokbaot sam samting long saed blong stamba tingting blong DPA.
- b) Ol mas sendemaot notis long miting ia 5 de blong wok bifo long miting, mo notis i mas talem taem, ples, de mo stamba tingting blong miting.
- c) I mas gat 10 memba evriwan i stap long eni miting ia bifo i save gohed.
- d) Sapos i no gat 10 man i stap, miting i save gohed be i mas mekem ripot blong hem long AGM.

9. FASIN BLONG VOT

Eni memba we i bin pem fi finis i save vot long eni miting. Sapos bitim haf long ol man we i stap long miting i sapotem vot, mosen ia i pas finis. Ol memba bae i save vot long eni fasin we i save mekem.

10. EKSEKUTIV KOMITI

- a) Ol memba blong Eksekutiv Komiti i mas lukaot gud ol bisnes blong DPA bitwin tu AGM. Komiti ia i mas mit bitim tri taem long evri yia.
- b) I mas gat 4 memba evriwan bifo miting i save gohed. Sapos i no gat 4 memba, miting i save gohed sapos 3 memba i stap mo oli ripot long nekis miting blong Eksekutiv Komiti.
- c) Ol memba blong DPA isave elektem ol memba blong Komiti long evri tufala yia long taem blong Jenerol Miting. Olgeta we isave stanap long eleksen imas stap long Jenerol Miting.
- d) Ples blong Jea, Treasura mo Sekretari imas go long olgeta we oli stap long hedkwota blong DPA. Ples blong Vaes Jea i mas go long wan memba we hem i stap aotsaed long hedkwota blong DPA.
- e) Blong miting blong Komiti isave gohet imas gat fofala memba we oli mas tap long miting. Sapos ino gat fofala memba, miting isave gohet sipos igat trifala memba we oli stap long miting. Evri ripot blong ol miting olsem isave go long nexfala miting blong Komiti.
- f) Sapos wan memba blong Eksekutiv Komiti i no kam long tri miting long eni yia mo hem i no givim wan gud risen, hem i lusum jea blong hem long Komiti. Sapos olsem, Eksekutiv Komiti i save apoenem wan nara memba we hem i bin pem fi finis blong tekem ples blong memba ia we i lusum jea blong hem.

- g) Eksekutiv Komiti i save apoenem mo sakemaot Kodineta mo save talem Kodineta wanem kaen wok hem i mas mekem.
- h) Kodineta i save kam memba blong Eksekutiv Komiti olsem wan advaesa.
- i) Eksekutiv Komiti i save invaetem ol memba blong ol nara oganaesesen we i wok wetem ol disebol pipol blong sitdaon wetem Komiti, be oli no save vot.
- j) Eksekutiv Komiti i save setemap eni sab-komiti sapos hem i wantem, olsem:
 - Sab-Komiti blong Faenens
 - Sab-Komiti blong Staf mo Memba
 - Sab-Komiti blong Loa
 - Sab-Komiti blong Program
 - Sab-Komiti blong ol papa mo mama wetem olgeta we i givhan.
 - Ol nara komiti

11. STANEMAP OL BRANSIS BLONG DPA

- a) Eksekutiv Komiti i save helpem blong stanapem long bransis long ol provins. Ol bransis olsem imas agri mo folem ol aem blong DPA mo Eksekutiv Komiti nau isave apruvum ol bransis olsem.
- b) Afta we Eksekutiv Komiti i apruvum wan bransis.
- c) Ol bransis wetem ol memba blong eni bransis i mas folem konstitusen blong DPA.
- d) Jenerol Miting nomo isave apruvum ol bransis.

12. FAENENS

- a) DPA i mas kipim ol gudfala rekod blong ol mane we i kasem o i spenem.
- b) Ol mane we DPA i kasem i mas go long wan bang we Eksekutiv Komiti i apruvum.
- c) Sapos eni man o oganaesesen i givim mane long DPA blong mekem wan samting, Kodneta i mas mekem sua se mane ia oli yusum long stret samting ia mo no wan nara samting.
- d) DPA i mas kipim wan buk blong ol kaon blong hem, mo eni memba i save luk buk ia eni taem hem i wantem.
- e) Odita we oli apoenem long AGM i mas oditim ol kaon blong DPA.

13. MAN WE I SAVE SAEN

Jeaman, Tresura mo Sekretari nomo i save saenem eni jek blong kaon blong DPA.

14. MAK

- a) I mas gat wan Mak (Common Seal) we Jenerol Miting i apruvum disaen blong hem

- b) Oli mas putum Mak ia long eni pepa we hem i abaot faenens blong DPA. Taem oli putum ia, i mas gat sam memba blong Eksekutiv Komiti blong witnesem.
- c) Kodineta i mas lukaotem Mak ia. Hem tu i mas kipim wan spesel buk we hem i kipim rekod blong eni pepa we oli saenem long nem blong DPA, wetem de mo taem we oli saenem.

15. OL RUL

DPA i save gat ol rul blong hem we i mas folem. AGM i save mekem o jenisim eni rul ia.

16. LONG SAED BLONG LO

DPA long nem blong hem i save tekem wan man i go long kot, mo tu eni man i save tekem DPA long nem blong hem i go long kot. Be eni memba o wokman blong DPA i no save tekem DPA i go long kot from eni samting we oli mekem long ofisol wok blong hem.

17. SAMTING WE DPA I GAT

- a) DPA i save pem mo holem taet eni samting, mo tu i save salem eni samting we i blong hem stret long fasin we hem i apruvum.
- b) DPA i save investem eni mani blong hem long wan bang o long gavman o long eni nara ples.

18. BLONG JENISIM KONSTITUSEN

Sapos oli wantem jenisim konstitusen, i mas gat bitim tu long evri tri memba we oli stap long AGM o nara jenerol miting we oli vot long mosen ia.

19. FINIS BLONG DPA

Sapos oli wantem finis blong DPA, minim se DPA i nomo laef, i mas gat bitim tu long evri tri memba we oli stap long wan spesel jenerol miting we oli singaotem blong tokbaot samting ia we oli vot long mosen ia.

20. LANWIS

Oli raetem Konstitusen ia long Inglis mo long Bislama, mo oli save raetem tu long sam nara lanwis blong kaontri. Be long saed blong loa, Konstitusen we oli raetem long Inglis hem i stret konstitusen blong DPA.

21. TAEM KONSTITUSEN I STAT

Oli pasem konstitusen ia long fes Nasional Jenerol Miting blong DPA long namba 23 dei long Februari long 2002.